

Surat khabar: Berita Harian (Wilayah)

Hari/Tarikh: 19/7/2016

Muka surat: 12

Tajuk : Kerjasama perluas eksport perabot Sarawak

Kerjasama perluas eksport perabot Sarawak



Awang Tengah (dua dari kanan) menyaksikan Sarudu (kanan) dan Dr Mohammad Kadim bertukar dokumen MoU di Kota Samaraham.

Kota Samaraham: Nilai eksport perabot dari Sarawak yang berjumlah RM20 juta setahun masih terlalu rendah berbanding nilai eksport produk berasaskan kayu negara yang kini mencapai RM7.2 bilion setahun.

Menteri Pembangunan Perindustrian dan Keusahawanan, Perdagangan dan Pelaburan, Datuk Amar Awang Tengah Ali Hasan, berkata nilai eksport itu tidak sepadan dengan kekayaan sumber balak di negeri ini.

Katanya, Sarawak kaya dengan hasil perkayuan yang boleh dimanfaatkan untuk menembusi pasaran luar negara bagi meningkatkan nilai eksport produk berasaskan kayu.

"Kita perlu mencontohi Johor yang menunjukkan perkembangan positif dalam industri perabot walaupun mereka kekurangan bahan mentah.

"Industri perabot di Johor berkembang bukan sahaja kerana mereka menggunakan kreativiti menghasilkan bahan mentah daripada getah dan kelapa sawit,

Fakta nombor

RM20 JUTA

setahun nilai eksport perabot dari Sarawak

RM7.2 BILION

setahun nilai eksport produk berasaskan kayu negara

malah mendapat kerjasama yang cukup baik dari Amerika Syarikat dan Eropah," katanya.

Beliau berkata demikian pada Majlis Menandatangani Memorandum Perjanjian (MoU) Kursi PUSAKA di antara Universiti Malaysia Sarawak (UNIMAS) dan Perbadanan Kemajuan Perusahaan Kayu Sarawak (PUSAKA) di Rumah Universiti UNIMAS di sini, semalam.

Kembang industri perabot
Perjanjian itu ditandatangani Pengurus Besar PUSAKA, Datuk Sarudu Hoklai bagi pihak PUSAKA dan Naib Canselor UNIMAS, Profesor Datuk Dr Mohammad Kadim Suaidi bagi pihak UNIMAS.

Awang Tengah berharap kerjasama antara PUSAKA dan UNIMAS dapat mengembangkan industri perabot Sarawak di pasaran tempatan dan luar negara.

"UNIMAS mempunyai ramai pakar dan mendapat pengiktirafan antarabangsa dari segi reka bentuk bagi menjalankan kajian dalam industri perabot Sarawak ke pasaran antarabangsa," katanya.